

3

Das zehende Capitel.

Auffgang gegen dem Niedergang gericht / vñ nach des *Aequatoris* oder seiner *parallelorum* Richtschnur vnd Circul / mit seinem teglichen vmbblauff / vollbracht wird. Seine *Polis* sind / so man der Welt *Polos* nennet / vnd mit einem eignen *Axe* / so mitten durch die Erden oder ganze Welt gehet / zusammen geheffet werden / Vmb welchen dieser erste Lauff des Himmels vmbgewalzt wird. Vnd sein vrsprünglicher gewalt vnd macht / entstehet von der anfenglichen Schöpfung im eussersten Himmel / welcher die andern alle vmbfengt vnd begreiffet / auch von dannen den Namen *Primi mobilis* / das ist / des Himmels von der ersten Bewegung bekommen hat. Dieser eusserste Himmel nimpt mit seinem vmbblauff alle vntere Sphären vnd auch einen grossen theil der obern Elementischen Region gewaltiglich herum. Von der vrsachen wegen ein solcher *motus* ime dem eussersten Himmel eigenthümlich vnd wesentlich zugeeignet wird / dem andern aber *per Accidens*, &c.

Der ander Lauff wird *Secundarius* genennet / welcher dann mit vielen *speciebus* vnterschieden wird. Dieser ist fürnemlich nach seiner erschaffenen proprietet / vom Untergang gegen dem Auffgang nach der Seithen gerichtet. Wie dann solcher Lauff in der Sonnen / Mond vnd anderen Planeten / Item etlichen Cometen / auffgemerckt wird. Zuweilen aber / wann er zuuorn ein wenig stillstehend ist / wendet er sich zu ruck / vnd vergleicht sich dem *Primario* / aber gemeiniglich sehr langsam / vnd einer kurzen zeit / Wie wir von den *Retrogradis Planetis* ♃ ♄ ♂ ♆ vnd ♀ erfahren : auch etwas geschwinder / als in etlichen zu ruck lauffenden Cometen erkandt wurde. Solcher ander Lauff ist zu zeiten auch mit andern eigenschafsten versehen / als das sich die Gestirn vbersich vnd vntersich in iren Sphären / neher oder weiter von der Erden bewegen / Wie solches von den jetzt ermelten Himmlischen Körpern allen probiert

3